

Lauda per i ladins

Pra l cunvèni scietifich sun l plurilinguism te scola, chëst'èna passada a Coira/Chur à la Scola ladina cun si model paritetich giapà gran stima da truep esperc de nivel nternaziunel

Cunvènies - L cunvèni à purtà truepa ideies nueves y à cuntribui a miurè y ntensifiché l cuntat danter scola ladina y la 'Scola auta da pedagogia dal Grischuin'.

Pra l cunvèni nternaziunel dal titul "Mehrsprachigkeit macht Schule", ai 20 y 21 de jené a Coira, iel unì mustrà gran nteres per l model dla Scola ladina. Tl referat prinzipel tenì dala professëura Rita Franceschini dl'Università de Bulsan, iel unì fat referimènt a l'analises linguistiches tla scoles elementeres y mesanes de Gherdeina y dla Val Badia che ie unides fates ti ultimi doi ani. I resultat de chësta analises testimonieia che la scola ladina ie n model garatà de plurilinguism.

Ai esperc de plu universiteies y scoles autes de pedagogia d'Europa ti iel te chësta ucajon unì prejentà la realtà di sculeies ladins che arjonj tl tudësch y talian scrit feter i medemi resultat sciche sculeies che ie de rujeneda d'oma tudëscia o taliana. La marueia che n se à fat per chisc resultat à nce giapà na majera lerch tla zaites locales ti Grijons. Ntan l cunvèni scietifich iel unì paredlà plu modiei de scola plurilinguistica dla Svizra y de duta Europa. L ntendènt Roland Verra à prejentà i modiei tla provinzia de Bulsan, mustran su l svilup di ultimi tèmps.

Dal cunfront nternaziunel iel unit a lum na lingia de ideies y

soluzions per la didatica plurilinguistica, cun danter l auter formes de nseniamènt tla segunda rujeneda, la didatica ntegrativa, l model CLIL (content & language integrated learning) y nsci inant. "Propi paredlan l'esperienzes fates cun d'autri modiei de nseniamènt àn abù la mprescion che la scola ladina ie da plu ponc de ududa danter i mièur modiei per n nseniamènt cun plu rujenedes", dij l ntendènt Roland Verra.

Per l responsabli dla Scola ladina à l cunvèni a Coira purtà n miuramènt di cuntac cun la 'Scola auta da pedagogia dal Grischuin' cun chëla che n cunleura bele n con' de barac de studèntes y studènc de pedagogia. Leprò iel stat n bon cunfront de esperienzes y didatica cialan sèura la sèides dl luech ora.

(usp)



Roland Verra.